

Eaa te NCEA?

NEW ZEALAND QUALIFICATIONS AUTHORITY



NEW ZEALAND QUALIFICATIONS AUTHORITY  
MANA TOHU MĀTAURANGA O AOTEAROA

Eaa te NCEA?

## Eaa te NCEA?

Ko te NCEA te akairo tinamou no te turanga kite tei rauka i te au tamariki apii tua-rua (secondary school) o Nu Tirenī nei.

Ko te aite'anga o te NCEA (National Certificate of Educational Achievement), ko te Setifiketi Basileia o te Turanga Apii Kite i Rauka). E, e toru turanga takainga e rauka mai ei teia: ko te au turanga takainga 1, 2 e te 3, ka apii te au tamariki kia rauka mai te kite mei te au mataiti 11 mai, ki te mataiti 13.

No te au tamariki apii katoatoa te NCEA – penei, ka neke atu tetai pae ki te apii tua-toru (university), penei te parani ra tetai pae i te aere ki te apii o te angaanga (apprenticeship), e penei tetai pae, te inangaro ra ratou kia apii'ia ratou kia maata atu to ratou kite i te rave i tetai au angaanga (practical skills) ei tauturu kia rauka viviki tetai ngai angaanga na ratou i te ra e akaruke ei ratou i te apii. Na taau e anoanao ra koe i te rave e tauturu ia koe i te iki i taau au apii (subjects) kia apii'ia koe.

## Te rauka'anga mai te au tuanga meitaki (credits)

I te tuatau mua, okotai tarere i te openga mataiti, e toru ora te roa, te tuatau e tarere'ia ai te au tamariki apii, ei ravenga kia kitea'ia ta ratou i rauka i te kite i roto i tetai apii okotai (a subject).



I ta te NCEA, e au tarere'anga basileia puapinga tetai (tei kapiki'ia e, ko te paunu akara'anga akatinamou [assessment] o va'o mai [external]) te ka raveia i te openga o te mataiti, ina ra, ka meitaki katoa koe kia tarere'ia, ka kore ra, kia paunu akara akatinamou akaou'ia (assessed), i tetai au tuatau o te reira mataiti – e kapiki'ia ana teia e, ko te paunu akara'anga akatinamou i roto (internal assessment), no te mea, ka raveia teia i "roto" i te apii.



Penei, ka manako'ia te paunu akara'anga akatinamou i roto (internal assessment) e, e maata atu te angaanga no teia, ina ra, kare oki e meitaki i te tarere i tetai au apii ma te noo ua ki raro – Eaa ka tātā'ia ai te pa'u'anga no tetai tarere o te saianesi (science), mei te mea e, ka rauka katoa ia koe i te raverave i te reira ki roto i te pia apii o te saianesi (science) e ka kitea'ia mai te pa'u'anga tikatikāi no teia; Eaa ka tātā'ia ai te rave'anga i te mi'i (mihi) a te Maori, mei te mea e, ka rauka ia koe i te tu ki runga ma te rave i te reira?

Kua akapupu'ia te au apii tatakaitai (subjects) e te NCEA ki roto i te au akapupu'anga o te au mea taau i anoano kia kite koe, e ka rauka ia koe i te rave – e kapiki'ia ana teia e, ko te au turanga (standards), no te mea, na teia e akanoo i te turanga.

E au tuanga meitaki (credits) to te au turanga tatakaitai – e ka tārē'ia te au tuanga meitaki (credits) ki roto i te turanga openga o te kite tei rauka mai. Ko tetai apii okotai (subject), mei te turanga 1 o te Ingilisi (level 1 English), penei, mei te ā ki te tai-ngauru tona au turanga, te ka taena te 20, me kore ra, tere atu, o te au tuanga meitaki (credits) te ka rauka mai.

Penei, ka na roto i te apii Ingilisi (English) te apii o te tātā'anga pakari (formal writing), mei te tātā tuku pati'anga no tetai ngai angaanga, e tetai, no te teatea-mamao'anga e te tuatua'anga i tei tātā'ia (delivering a speech). Ka tarere'ia tetai pae o teia au turanga i te tuatau tarere i te openga mataiti, e ko tetai pae, ka paunu akara akatinamou'ia i tetai au tuatau o te mataiti.

Ko te ravenga e rauka mai ei taau turanga 1 o te NCEA no te kite i te apii, ka anoano'ia koe kia rauka mai ia koe e 80 au tuanga meitaki (credits). Ka anoano katoa ia te au turanga o te tatau, te tātā, e te apii numero (maths) (literacy and numeracy [te kite i te tatau e te kite i te apii numero]) kia kitea'ia mai i roto i teia au tuanga meitaki (credits) tei rauka mai.

Ka rauka ia koe i te akaputu i taau au tuanga meitaki (credits) tei rauka mai i te reira mataiti – me kore ra, tere atu i te mataiti okotai – e me rauka mai ana taau au tuanga meitaki (credits), ka vai tinamou te reira e rau te tuatau. E ka rauka katoa ia koe i te akapapu ua rai e, e ia aau au tuanga meitaki (credits) e rauka maira ia koe e akaputu ra i te reira.

## Akako'ia ki runga ua atu ei

Me tae atu te akakite i taau au apii i rauka i te tarere'anga, ka kite koe e, e ia aau tuanga meitaki (credits) i rauka mai – ina ra, e maata katoa atu ta taau i rauka mai te ka akaari'ia atu, i to te – "kua pāti i te NCEA turanga 1" ua.

Ka akaari atu taau au apii i rauka mai ia koe, i te au turanga tatakaitai – ma tetai rata katoa i te pae i teia au turanga tatakaitai – N, A, M, E.

Ko te aite'anga o teia au rata, Kare i Rauka (Not Achieved), Kua Rauka (Achieved), Turanga Teitei (Merit), Turanga Teitei Maata Atua (Excellence). Na teia e akakite atu i toou turanga kite tei rauka ia koe.

Kia maara ua rai ra e, i teia tuatau, ko te aite'anga o te E, e Turanga Teitei Maata Atua (Excellence). I te tuatau mua, e nuti kino te aite'anga o te E.

Kare aau au tuanga meitaki (credits) ke atu e rauka mai no tei tu koe i te Turanga Teitei e te Turanga Teitei Maata Atua, ina ra, e au tumu meitaki tetai o te akako'ia kia teitei atu ki runga.

Me rava meitaki taau au tuanga meitaki (credits) o te Turanga Teitei (Merit), me kore ra, o te Turanga Teitei Maata Atua (Excellence) – me taena te 50 – ka rauka mai toou

Turanga Teitei e te Turanga Teitei Maata Atua te ka ō katoa atu ki roto i toou turanga kite a te NCEA – e kapiki'ia ana teia e, ko te Setifiketi Akatinamou'anga (Certificate Endorsement).


E tumu puapinga to te akako'ia ki runga ua atu ei, ua atu e, kua taena ia koe te 80 au tuanga meitaki (credits).

E puapinga katoa te ka rauka mai i te Turanga Teitei (Merit) e te Turanga Teitei Maata Atua (Excellence) me te meitaki ra taau rave'anga i tetai apii (subject), me kore ra, i tetai apii'anga (course) e raveia ra.

Me rauka ia koe e 14 tuanga meitaki (credits) o te Turanga Teitei (Merit) (me kore ra, te Turanga Teitei Maata Atua [Excellence]) no tetai apii okotai, mei tera ra, te apii numero (maths), me kore ra, te apii miusiki (music), ka oronga'ia atu toou Akatinamou'anga Apii'anga (Course Endorsement).

Ka roto teia ei tauturu ia koe me akaari koe i taau i rauka ki te tangata, me akaruke koe i te apii – ei ravenga kia rauka taau ngai angaanga, me kore ra, no taau ka anoano i te rave me aere koe ki te apii tua-toru (tertiary course).





## Te tere mamao (journey) tano meitaki

Mei te tere mamao (journey) te tu o toou tuatau ia koe i te apii tua-rua (secondary school). Penei, i te akamata'anga, mei te mea atura e, tei te enua koe o tetai ke, ina ra, kare e roa ia, ka akamata koe i te kite meitaki aere mai i te reira ngai, i te akara kimi aere i te au ngai ou, e te au manako ou.

Mei tetai tere mamao ki tetai ngai, e mea puapinga kia kite koe i taau ngai e inangaro ra i te aere, e tetai māpu no te parani'anga e, ka akapeea koe e tae ei ki reira. Ka anoano'ia koe kia kite e, ko te au apii (subjects) taau e apii ra, ka tau te mataara no te apai ia koe ki te reira ngai. E mea puapinga maata te akamanako meitaki i te au apii (subjects) e rauka maira taau au tuanga meitaki (credits) mei reira mai, ma te akakoro'ia e koe kia taena ki runga ua atu ei.

Me te akakoro ra koe i tetai angaanga naau, me kore ra, no te aere ki tetai apii tua-toru (tertiary course), ka anoano'ia koe kia rauka taau au tuanga meitaki (credits) o te au turanga te ka tau ki te au pu ona angaanga, me kore ra, ta te apii tua-toru (university), me kore ra, tetai ua atu au apii tuatoru (tertiary institutions) ka anoano i te kite i roto i taau au tarere'anga. E au akapapa'anga takake tetai o te au apii (subjects), e tei te turanga 3 te maata'anga, o te kou'anga o te University Entrance (te Turanga Tomo ki te Apii Tua-toru).



Ina ra, kare mei te mea e, no tei rauka mai taau University Entrance (Turanga Tomo ki te Apii Tua-toru), e ka meitaki ua koe i te aere atu ki te apii tua-toru no te apii i taau i anoano i te rave. I teia tuatau, ka anoano te au apii tua-toru kia maata taau au Turanga Teitei (Merit), me kore ra, au Turanga Teitei Maata Atu (Excellence) i roto i taau au tarere'anga – ko tetai tumu puapinga teia i anoano'ia ai kia akakoro'ia e koe ki runga ua atu ei (aiming high).

## Te Kou'anga

E akapapu meitaki koe e, ka tau te au turanga taau e apii ra i te oronga atu i te au mea taau e anoano ra no te rave i te tuatau me akaruke koe i te apii. No te mea, kua ariki to to teianei-ao i te NCEA, ko te aite'anga i reira, ka rauka katoa ia koe i te aere ki tetai apii tua-toru (university) i tetai enua ke i va'o mai.

E akapapu meitaki katoa koe e, ko te au turanga teitei rava atu te ka rauka, taau e aruaru ra – kia maata ua atu ei taau au Turanga Teitei Maata Atu, me kore ra, au Turanga Teitei kia rauka mai.

Me e au uiana taau, e uriuri manako koe ki toou nga metua, me kore ra, ki toou kopu tangata. Me kore ra, e komakoma atu koe ki te aronga kite (experts). E ui koe ki toou au puapii, atoro'ia atu te roro uira atuitui a te NZQA – [www.nzqa.govt.nz/ncea](http://www.nzqa.govt.nz/ncea) - me kore ra, ringi'ia atu te NZQA ki runga i te numero 0800 697 296



New Zealand Qualifications Authority

**P** 0800 697 296

**E** [helpdesk@nzqa.govt.nz](mailto:helpdesk@nzqa.govt.nz) | [www.nzqa.govt.nz](http://www.nzqa.govt.nz)

Tātā/nenei'ia i te mataiti 2012

Ka rekareka maata matou i te kite i to kotou manako no teia pepa meangiti akakitekite tuatua. Me ka tika, atoro'ia atu te: <http://www.govt.nz/brochures> no te akaki akaoti i te pepa kimi'anga manako poto no teia.



NEW ZEALAND QUALIFICATIONS AUTHORITY  
MANA TOHU MĀTAURANGA O AOTEAROA

New Zealand Government